

比之于秦，其张仪乎？诸国之受其患亦多矣！

初八日。李丹崖巴黎信：巴黎西南汕夕阿炮台，为陆路最大之新式炮台，曾往一游。兼游矿务博物院，为楼三层，各十二大间，每间纵横五丈，罗列地质矿块五十三万馀种。左为化学院，院屋二十四间，以习各种化分之法。右为学堂，学生一百四十五人，各给凭入院学习，以三年为期，不具脩金。前年日本在院学习四十馀人，已陆续回国开矿，今存者二人。上层为各种开矿机器小样，下层为试演烹炼大炉。取精用宏，足以为欧洲之冠矣。英、法两国制造学问，穷极推求。法国立国尤久，其学馆书籍亦驾欧洲。以二千馀里之地，称雄海外，非无因也。日本晚出，汲汲仿而效之。其向学之精且锐，日进无穷。中国乃一以虚骄之大言当之，吾真无如此蚩蚩之士大夫何矣。闻日本公使上野景范前赴俄国都城，不知其何为，英人相与惊异。急遣马格里探之费音，则初有是议，未成行也。晚邀定得登、色尔娄、旁思密飞音、阿里克、旁思弗得、珥伯尊、波尔克、立斯得、布妥玛、威妥玛、科里、三多逊、哈尔费诸人会宴。定得登所定日期也，已而竟辞不至。此外辞者四人：珥伯尊、波尔克、立斯得、布妥玛。至者八人。

初九日。发递礼部议驳明儒王夫之从祀，请飭部存案以俟论定一折，咨请总理衙门代进。并咨新加坡领事胡璇泽应领俸薪及关防仍由北、南洋大臣核给，并抄发总署奏件作为赴任文凭。共咨案三件，并致总署第十六信、合淝伯相第十七信，及李筱荃、曾沅甫、唐景星、朱宇恬，及家信第十六号，及志城一信。其新加坡设立领事，分咨北、南洋大臣；王夫之从祀飭部存案，分咨礼部及湖督及南抚及学政；并札飭新加坡领事，加致胡玉玠一信。丹崖述刘云生情形，一意矜张而钻营鄙劣，多可笑者。自以才能

见任，一处理换约事件，即邀督抚酬庸之典，言之无忌。闻德国主有所亲信，即百计谋结纳之，通贿求进，以求一遂其私。即洋人博琅亦厌鄙之。诚不意此君行径恶劣至此。法国《通律》，前已由禧在明寄送总署。闻意大利亦有此书。德国近年编纂成律，则尚未成书也。西洋律法多门：有成律，谓曾办过之成案也，有议律，上下议院所定也。例案参差，又时有更改，故勒为一书。亦不足据以行远。闻有马尔克敦《条约汇纂》一书，专取百余年各国所订条约，分类编辑，为通商各口所必不可少之书。已属罗稷臣为一购之。晚赴谛克生茶会，晤美公使魏拉斯，年七十二矣，而精力强健，远胜鄙人。又晤医士利觉尔生，著书言厨屋须在住房之上。英人笑之，而吾心极韪之。又管理戏园毕噶得，内大臣赫尔弗尔得属官也。凡戏馆编造戏文，皆先送阅而后演习之。问亦至戏园查察乎，曰：戏文即无伤风化，而恐其演习或至淫猥，则为害滋甚，安能不查察？而凡戏馆盖造，一有不慎，则煤气灯易至引火，均须时一查察。往时演戏皆以夜，近年因妇女童稚夜睡不宜迟，添下午演习。亦有世家巨族，晚膳常至八点钟，不能更入戏馆。皆所以取便民俗之意也。又有武官统领罗，年六十，虬髯方面，自陈任兵官四十年，三十年时，英、俄交战，相持于巴拉克拉法、俄地也，陈列炮兵甚盛，其旁列枪队。时方为伍长，随队长率步〔兵〕六百人持短兵搏战。忽一人驰至，传统将令，使夺取俄国炮架。群相顾愕眙。队长曰：兵少势不敌。虽然将令也，吾何敢违。率所部驰取其炮。俄军炮不及施，而此六百人者已近薄之，各伏炮架旁持刀击刺，炮架为所掀翻。而六百人战且毙者三百余人，力益不支，始退。队长与传令者皆战没。渠与军（二）〔士〕还者二百人。时统帅为喀尔谛芬伯，云当时实未传此令。至今不能明也。又哈尔库尔德，为阿斯福客来斯觉尔治教师，



精于化学，于煤气之用尤为专门，英人谈煤气者皆推服之。问之，所授艺十有四人，其外附学者听从其便，惟不能入学馆居住。已而令带内里哈得谛入席，始知其酒会也。继以跳舞会。又男妇十二人四面立，各相与为偶，凡六偶，联臂踏歌，回合进退。大率为其二女连姻，因有此会。所费亦至巨矣。

初十日。接上海十月廿五日由英国果利治公司船递到五十二号包封，内何子峨、张鲁生咨报出洋日期。知以八月初五日出京，十九日至上海，至十月十九日始发陈报出洋一折，驻上海两月有馀。携带人员：参赞黄遵宪，正理事范锡朋，副理事徐璠中书，西学翻译洋员麦加谛及沈鼎钟、张宗良，东学翻译潘任邦郎中、冯昭炜，随员沈文荧、陈文史郎中、廖锡恩、李郁阶、吴广霈、张鸿祺、陈衍范、何定求，供事任敬和、刘坤，凡十八人。据称原调徐庆铨、徐寿朋，以事未能随行。是凡调二十人。传曰：济济多士，文王以宁。能官人也，亦可谓盛矣！并接何子峨一信，又接胡玉玠新加坡一信。李丹崖晚邀同姚彦嘉、李湘甫、德在初、凤夔九、黄玉屏、罗稷臣、马格里至加非罗亚尔酒馆小酌。因语及煤气之学。所见圆屋，即收贮煤气处也。旁设烧煤灶炉数座，惟开一小火门，上为铁盖，四旁环闭之，不令泄气，而于铁盖为小管，以达之收贮煤气处。盖圆屋中凿池蓄水，覆铁钟水中，系链圆屋顶。煤气铁管从钟顶贯入，其气不能透水，皆浮于水上。铁钟为气所鼓荡，渐次负之以上浮。俟蓄满其中，则皆旁管引气使过水，别为一管，入水中与引气管相向，而空其中不使相连，气入水中不能上透，而别管中空气纳之使人，煤油乃于空处缘铁管而浮出水面。盖煤油与气皆从灶管中上腾，过水而气自入别管，油自上浮，至是始分。此项煤油不能发光，亦可用以炼铁，不能燃灯。又引气使人石灰池，亦蓄水，而纳两铁管，空其中，煤气过石灰水中